

四庫全書

集部

欽定四庫全書

集部

御定全唐詩錄卷八十三

詳校官左中允_臣瑋五珠

主事銜_臣徐以坤覆勘

總校官原任中允_臣王燕緒

校對官中書_臣田尹衡

謄錄監生_臣張鈞

欽定四庫全書

御定全唐詩錄卷八十三

司空圖

圖字表聖河中虞鄉人咸通末擢進士第繇宣歙
幕歷禮部郎中僖宗行在用為知制誥中書舍人
知天下必亂歸隱中條山王官谷有先世別墅泉
石林亭頗愜幽趣日與名僧高士遊詠其中自號
知非子耐辱居士豫為壽壙引客坐其中賦詩酌

酒徘徊客或難之笑曰君何不廣生死一致吾寧
暫遊此中哉布衣鳩杖歲時村社雩祭祠禱鼓舞
會集必造之與野老同席無傲色龍紀乾寧間徵
拜舊官及以戶兵二部侍郎召皆不起遷洛後被
詔入朝陽為野耄狀丐歸梁召為禮部尚書不應
哀宗被弑不懌數日卒圖少有俊才晚年遭亂避
世多詭激嘯傲之辭有一鳴集三十卷內詩十卷
圖嘗論詩云沈宋始興之後傑出於江寧宏肆於

李杜右丞蘇州趨味澄負若清沈之貫達大厯十
數公抑又其次元白力勅而氣孱都市豪估耳劉
夢得楊巨源亦各有勝會閬仙無可劉得仁輩時
得佳致亦足滌煩厭後所聞逾褊淺矣經亂索居
得所錄尚累百篇適自編一鳴集撐霆裂月劄作
者之肝脾亦當吾言之無忤也

又云詩貫六義諷諭抑揚淳蓄淵雅皆在其間惟
近而不浮遠而不盡然後可言韻外之致愚幼常

自負既久而愈覺缺然得於春早則有草嫩侵
沙長冰輕著雨消又人家寒食月花影午時天又
雨微吟足思花落夢無悞得於山中則有坡暖冬
生筍松涼夏健人又川明虹照雨樹密鳥衝人得
於江南則有戍鼓和潮暗船燈照島幽又迴塘春
盡雨方響夜深船又夜短猿悲減風和鵲喜靈得
於塞下則有馬色經寒慘雕聲帶晚飢得於喪亂
則有驛驕思故第鸚鵡失佳人又鯨鯢入海涸魑

魁棟林幽得於道宮則有棋聲花院閉幡影石壇
高得於夏景則有地涼清鶴夢林靜肅僧儀得於
佛寺則有松日明金像苔龕響木魚又解吟僧亦
俗愛舞鶴終卑得於郊原則有暖景雞聲美微風
蝶影繁又遠陂春草濛猶有水禽飛得於樂府則
有晚妝留拜月春睡更生香得於寂寥則有孤螢
出荒池落葉穿破屋得於愜適則有客來當意愜
花發遇歌成雖庶幾不濱於淺涸亦未廢作者之

譏訶也七言云逃難人多分隙地放生鹿大出寒
林又得劍下如添健僕亡書久似憶良朋又孤嶼
池痕春漲滿小欄花韻午晴初皆不拘於一槩又
論絕句詩本於詣極則有殷勤元日日欹午又明
年五更惆悵迴孤枕猶是殘燈照落花此外千變
萬化不知所以神而自神

計敏夫云司空圖陽時思古退已避禍清音冷然
如世外道入所謂變而不失其正者

古體詩

感時

好鳥無惡聲仁獸肯狂噬寧教鸚鵡啞不遣麒麟吠
人語與默唯觀利與勢受毀亦自遭掩謗終失計

秋思

身病時亦危逢秋多慟哭風波一搖蕩天地幾翻覆孤
螢出荒池落葉穿破屋勢利長草草何人訪幽獨

短歌行

烏飛飛兔蹢蹢朝來暮去催時節
女蝸只解補青天不解煎膠粘日月

馮燕歌

魏中義士有馮燕遊俠幽并最少年
避讎偶作滑臺客嘶風躍馬來翩翩
此時恰遇鶯花月堤上軒車畫不絕
兩面高樓語笑聲指點行人情暗結
擲果潘郎誰不慕朱門別見紅妝露
故推門掩不開似教歐軋傳言語
馮生敲鐙袖籠鞭半拂垂楊半惹烟
樹間春鳥知人意

的的心期暗與傳傳道張嬰偏嗜酒從此香閨為我有
梁間客燕正相欺屋上鳴鳩空自鬪嬰歸醉臥非雛汝
豈知負過人懷懼燕依尸扇欲潛逃巾在枕傍指令取
誰言狼戾心能忍待我情深情不隱回身本謂取巾難
倒柄方知授霜刃馮君撫劒即遲疑自顧平生心不欺
爾能負彼必相負假手他人復在誰窻間紅艷猶可掬
熟視花鈿情不足唯將太義斷習襟粉頸初回如切玉
鳳凰釵碎各分飛怨魄嬌魂何處追

集作

凌波如喚遊

金谷羞彼揶揄淚滿衣新人藏匿舊人起白晝喧呼駭
鄰里誣執張嬰不自明貴免生前遭考捶官將赴市擁
紅塵掉臂人來擗看人傳聲莫遣有冤濫盜殺嬰家即
我身初聞僚吏翻疑歎呵叱風狂詞不變縲囚解縛猶
自疑疑是夢中方脫免未死勸君莫浪言臨危不顧始
知難已為不平能割愛更將身命救深冤白馬賢侯賈
相公長懸金帛募才雄拜章請贖馮燕罪千古山河激
義風黃河東注無時歇注盡波瀾名不滅為感詞人沈

下賢長歌更與分明說此君精爽知猶在長與人間留

炯誠鑄作金燕香作堆焚香酬酒聽歌來

沈下賢馮燕傳云燕魏人

少以意氣任俠為擊毬鬪雞戲魏氏有鬪者燕往搏殺不平遂匿亡滑時相國賈公耽在滑能燕才留軍中他日行里中見戶傍婦人色甚冶使人熟其意遂室焉其夫滑將張嬰也會嬰從其類飲燕伺間偃寢中拒戶嬰還妻開戶納嬰以裾蔽燕燕卑脊步就蔽轉匿戶扇後而巾墮枕下與佩刀近嬰醉且瞑燕指巾令其妻取妻取刀授燕燕熟視斷其妻頸持巾去明旦嬰起見妻死愕然嬰鄰以為嬰殺之縛以告其妻黨共持白不能言收繫強伏其辜將就市看者圍面千餘人有一人排看者呼曰無令不辜死者吾竊其妻而又殺之當繫我吏執之乃燕也與見賈公公以狀聞請歸其印以贖燕死上義之下詔凡滑城死罪皆免

麗情集以此歌為沈

下賢作注文苑英華者誤採之下
賢有其傳未嘗作歌也集可考

近體詩

早春

傷懷同客處病眼即花朝
草嫩侵沙長冰輕著雨銷
風光知可愛容髮不相饒
早晚丹丘伴飛書肯見招

塞上

萬里隋城在

隋大業三年築長城

三邊虜氣衰沙填孤障角燒斷

故關碑馬色經寒慘雕聲帶晚悲

本集作飢

將軍正閒暇留

客換歌辭

江行

地濶分吳塞楓高映楚天迴

一作曲

塘春盡雨方響夜深

船行紀添新夢羈愁甚往年何時京洛路馬上見人烟

下方

三十年來往中間京洛塵倦行今白首歸臥已清神坡

暖冬生

一作抽

筍松涼夏健人更慚徵詔起避世跡非真

昏旦松軒下怡然對一瓢雨微吟足思花落夢無慘細

事當棋遣衰容喜鏡饒溪僧有深趣書至又相邀

月下留丹竈

有序

詩題五字乃真仙之詞也邵陽其縣人或聞其
山實異齋禱積稔果有蹈空而至者涉筆附楹
久之乃罷去既而熟視本文則字皆隱起成列
矣某年中廉帥上聞且命鑱其逸跡藏於郡解
其後為刺史李岫所得今傳於君孫豈精契之
所感致耶光啟三年秋八月既望愚獲覩於王

官別業憶跡雖顯奇道必體正故為物怪之所
中者見之莫不洗然欲蓋其事目擊可數也吾
知挾邪佞以冒進者亦當膽慄自廢豈侯圖鼎
燬犀而後辨奸妖之詭態哉綴之全篇以志誠
敬且期自警泗水司空氏記

月下留丹竈壇邊樹羽衣異香人不覺殘夜鶴分飛朝
會初元盛蓬瀛舊侶稀瑤函真跡在妖魅敢揚威

長安贈王沔

正下搜賢詔多君獨避名客來當意愜花發遇歌成樂
地留高趣權門讓後生東風閒小駟園外好同行

僧舍貽友人

笑破人間事吾徒莫自欺解吟僧亦俗愛舞鶴終卑竹
上題幽夢溪邊約敵碁舊山歸有阻不是故遲遲

贈圓昉公

昉蜀僧僖宗幸
蜀昉堅免紫衣

天堦讓紫衣冷格鶴猶卑道勝嫌名出身閒覺老遲晚
香延宿火寒磬度高枝每說長松寺他年與我期

寄鄭仁規

清才鄭小戎標的貴遊中
萬里雲無侶三山鶴不籠
香和丹地煖晚著綠衣風
榮路期經濟唯應在至公

寄永嘉崔道融

旅寓雖難定乘閒是勝遊
碧雲蕭寺霽紅樹謝村秋
戍鼓和潮暗船燈炤島幽
詩家多滯此風景似相留

上陌梯寺懷舊僧

雲根禪客居皆說舊吾廬
松日明金像山風一作響木

魚依棲應不阻名利本來疎縱有人相問林間懶折書

華下送文洎

郊居謝名利何事最相親
漸與論詩久皆知得句
新川明虹照雨樹密鳥
衝人應念從今去還來
獄下頻

五十

閒身事少只題詩
五十今來覺陡衰
清秩偶叨非養望
丹方頻試更堪疑
髭鬚強染三分折
絃管遙聽一半悲
漉酒有巾無黍釀
負他黃菊滿東籬

退栖

官遊蕭索為無能
移住中條最上層
得劒乍如添健僕
亡書久似憶良朋
燕昭不是空憐馬
支遁何妨亦愛鷹
自致此身繩檢外
肯教世路日兢兢

華下

籜冠新帶步池塘
逸韻偏宜夏景長
扶起綠荷承早露
驚迴白鳥入殘陽
久無書去干時貴
時有僧來自故鄉
不用名山訪真訣
退休便是養生方

浙川

華下支離已隔河，又來此地避干戈。
山田漸廣猿頻到，村舍新添燕亦多。
丹桂石壇宜並長，秦雲楚雨暗相和。
兒童粟熟迷新逕，歸去仍隨牧豎歌。

西北鄉關近帝京，烟塵一片正傷情。
愁看地色連空色，靜聽歌聲似哭聲。
紅蓼遮村人不見，青山繞檻路難平。
從教烟擢更南去，休向津頭問去程。

書懷

病來猶強引雛行力上東原欲試耕幾處馬嘶春麥長
一川人喜雪峯晴閒知有味心難肯道貴謀安迹易平
陶令若能兼不飲無絃琴亦是沽名

丁未歲歸王官谷有作

家山牢落戰塵西匹馬偷歸路已迷塚上卷旗人簇立
花邊移寨鳥驚啼本來薄俗輕文字却致中原動鼓鼙
時取一壺閒日月長歌深入武陵溪

歸王官次年作

亂後燒殘滿

一作數

架書峰前猶自戀吾廬忘機漸喜逢

人少覽鏡空憐待鶴疎孤興池痕春漲滿小欄花韻午晴初酣歌自適逃名久不必門多長者車

丁巳重陽

重陽未到已登臨探得黃花且獨斟客舍喜逢連日雨家鄉似響隔河砧亂來已失耕桑計病後休論濟活心自賀逢時能自棄歸鞭唯拍馬羈吟

重陽山居

詩人自古恨難窮
暮節登臨且喜同
四望交親

一作四座賓朋

兵亂後一川風物笛聲中
菊殘深處迴幽蝶
陂動晴光下早鴻
明日更期來此醉
不堪寂寞對衰翁

山中

全家與我戀孤岑
蹋得蒼苔一徑深
逃難人多分隙地
放生鹿大出寒林
名應不朽輕仙骨
理到忘機近佛心
昨夜前溪驟雷雨
晚晴獨步數峰吟

喜王駕小儀重陽相訪

白菊初開臥內明
聞君相訪病身輕
樽前且撥傷心事
谿上還隨覓句行
幽鶴傍人疑舊識
殘蟬向日噪新晴
擬將寂寞同留住
且勸康時立大名

樂府

寶馬跋塵光
雙馳照路傍
喧傳報戚里
明日幸長楊

即事

茶爽添詩句
天清瑩道心
只留鶴一隻
此外是空林

漫書

剩欲逢花折須拚冒雨頻
晴明開漸少莫怕濕新巾

偶書

蜀妓輕成妙吳娃狎共纖
晚妝留拜月卷上水精簾

漫題

亂後他鄉節燒殘故國春
自憐垂白首猶伴踏青人
齒落傷情久心驚健忘頻
蝸廬經歲客蠶市異鄉人

退居漫題

花缺傷難綴鶯喧奈細聽
惜春春已晚珍重草青青

燕語曾來客花催欲別人莫愁春又過
看著又新春
身外都無事山中久避喧
破巢看乳燕留果待啼猿

偶題

水榭花繁處春晴日午前
鳥窺臨檻鏡馬過隔牆鞭

雜題

孤枕聞鶯起幽懷獨悄然
地融春力潤花泛曉光鮮
樓帶猿吟迴庭容鶴舞寬
曠書因閱畫封藥偶和丹
驛步隄繁閣軍城鼓振橋
鷗和湖雁下雪隔嶺梅飄

舴艋猿偷上蜻蜒燕競飛
樵香燒桂子苔濕挂莎衣
溪漲漁家近烟收鳥道高
松花飄可惜睡裏灑離騷

卽事

宿雨川原霽憑高景物新
陂痕侵牧馬雲影帶耕人
十年身隱地一雨太平心
匣澁休看劒窗明復上琴
衰鬢閒生少丹梯望覺危
松須依石長鶴不傍人卑
林鳥頻窺靜家人亦笑慵
舊居留穩枕歸臥聽秋鐘
幽鳥穿籬去鄰翁採藥回
雲從潭底出花向佛前開

元日

甲子今重數生涯只自憐殷勤元日日欹午又明年

中秋

閒吟秋景外萬事覺悠悠此夜若無月一年虛過秋

獨坐

幽徑入桑麻隴西逢一家編籬新帶圃補屋草和花

獨望

綠樹連村暗黃花入麥稀遠陂春早濛猶有水禽飛

秦關

形勝今雖在，荒涼恨不窮。
虎狼秦國破，狐兔漢陵空。

樂府

五更窗下簇妝臺，已怕堂前阿母催。
滿鴨香薰鸚鵡睡，隔簾燈照牡丹開。

楊柳枝壽孟詞

臺城細仗曉初移，詔賜千官襍飲時。
綠帳遠籠清珮響，更曛晴日上龍旗。

桃源仙子不須誇
聞道惟栽一片花
何似浣沙溪畔住
綠陰相間兩三家

偶然樓上捲珠簾
往往長條拂枕函
恰值小娥初學舞
擬偷金縷押春衫

絮惹輕枝雪未飄
小溪烟束帶危橋
鄰家女伴頻攀折
不覺回身睂翠翹

處處繁空百萬枝
一枝枝好更題詩
隔城遠岫招行客
便與朱樓當酒旗

日暖津頭絮已飛
看看還是送春歸
莫言萬緒牽愁思
緝取長繩繫落暉

浪淘沙

不必長漂玉洞花
曲中偏愛浪淘沙
黃河却勝天河水
萬里縈紆入漢家

遊仙

蛾眉新畫覺嬋娟
鬪走將花阿母邊
仙曲教成慵不理
玉階相族打金錢

劉郎相約事難諧
雨散雲飛自此乖
月姊殷勤留不住
碧空遺下水晶釵

漫書

長擬求閒未得閒
又勞行役出秦關
逢人漸覺鄉音異
却恨鶯聲似故山

溪邊隨事有桑麻
盡日山程十數家
莫怪行人頻悵望
杜鵑不是故鄉花

偶書

情知了得未如僧客處高樓莫強登鶯也解啼花也發
不關心事最堪憎

狂題

昨日流鶯今日蟬起來又是夕陽天六龍飛轡常相窘
更忍乘危自著鞭

南北史感遇

雨淋麟閣名臣畫雪臥龍庭猛將碑不用黃金鑄侯印
盡輸公子買蛾眉

漢世頻封萬戶侯，雲臺峻謝風流。江南不有名儒相，
齒冷中原笑未休。

行樂最宜連夜景，太平方覺有春風。千金盡把酬歌舞，
猶勝三邊賞戰功。

桃芳李艷年年發，羌管蠻弦處處多。海上應無三島路，
人間唯有一聲歌。

佳人自折一枝紅，把唱新詞曲未終。惟向眼前憐易落，
不如拋擲任春風。

華嶽廟裴晉公題名

嶽前大隊赴淮西從此中原息鼓

一作戰

聲石闕莫教苔

蘚上分明認取晉公題

雨中

維摩居士陶居士盡說高情未足誇
簷外蓮峰階下菊
碧蓮黃菊是吾家

山中

凡鳥愛喧人靜處閒雲似妬月明時
世間萬事非吾事

只愧秋來未有詩

王官

風荷似醉和花舞沙鳥無情伴客閒總是此中皆有恨
更堪微雨半遮山

荷塘煙罩小齋虛景物皆宜入畫圖盡日無人只高臥
一雙白鳥隔紗櫺

修史亭

圖山居記曰中條五老峯頗勝會昌毀佛
宮因為我有本名王官谷易之禎貺溪乃

刻大悲像構亭其右曰修史勗所職也
著也擬綸之右亭曰修史勗所職也

山前鄰叟去紛紛，獨強衰羸愛杜門。
漸覺一家看冷落，地爐生火自溫存。

甘心七十且酣歌，自筭平生幸已多。
不似香山白居士，晚將心事著禪魔。

烏紗巾上是青天，檢束酬知四十年。
誰料平生臂鷹手，挑燈自送佛前錢。

按北夢瑣言云：圖為王凝所知，後分司又為舊相盧攜所知，故云。

贈日東鑒禪師

一作鄭谷

故國無心度

一作渡

海潮老禪方丈倚，中條夜深雨絕松。

堂靜一點飛

一作山

螢照寂寥

汴柳半枯因悲柳中隱

行人莫歎前朝樹已占河堤幾百春
惆悵題詩柳中隱
柳衰猶在自無身

歌

處處亭臺只壞牆
軍營人學內人妝
太平故事因君唱
馬上曾聽隔教坊

歌者

不似新聲唱亦新旋調玉管旋生春愁腸隔斷珠簾外
只為今宵共聽人

五柳先生自識微無言共笑手空揮曾中免被風波撓
音繞肯為螳螂動殺機

故鄉杏花

寄花寄酒喜新開左把花枝右把杯欲問花枝與杯酒
故人何得不同來

力疾山下吳村看杏花

浮世榮枯總不知且憂花陣被風欺
儂家自有麒麟閣
第一功名只賞詩

近來桃李半燒枯歸臥鄉園只老夫
莫笑明年人在否
不知花得更開無

白菊

登高可羨少年場白菊堆邊鬢似霜
盡弄更希沾上藥
今朝第七十重陽

黃昏寒立更披襟露浥清香悅道心
却笑誰家尚繡戶

正董龍蔚暖鴛衾

許棠

棠字文化宣州涇縣人與張喬諸人同以詩名時號咸通十哲久困名場李頻為京兆參軍主解試首薦之始得登第初授涇縣尉又嘗為江寧丞

金華子云許棠晚年登第嘗曰自得一第筋骨輕健愈於少年則知成名乃孤進之還丹

紀事云棠有洞庭詩為工人題扇號為許洞庭

近體詩

野步

閒賞步易遠野吟聲自高路無人到跡林有鶴遺毛物
外趣都別塵中心枉勞沿溪收墮果坐石喚飢猱

泗上早發

獨起無人見長河夜泛時平蕪疑自動落月似相隨楚
外離空早關西去已遲漁歌聞不絕却軫洞庭思

過洞庭湖

驚波常不定半日鬢堪斑四顧疑無地中流忽有山鳥
飛應畏墮帆遠却如閒漁父時相引行歌浩渺間

雁門關野望

高關閒獨望望久轉愁人紫塞唯多雪胡山不盡春河
遙分斷野樹亂起飛塵時見東來騎心知近別秦

新年呈友人

一月月相似一年年不同清晨窺古鏡旅貌近衰翁處
世閒難得闕身事半空浮生能幾許莫惜醉春風

寄藍屋薛能少府

滿縣唯雲水何曾似近畿
曉庭禽集慣寒暑吏衙稀
冰色封深澗樵聲出翠微
時聞迎隱者依舊著山衣

送王侍御赴宣城

朝回離九陌島外賞殘春
經宿留閒客看雲作主人
時清難議隱位重亦甘貧
巖洞真仙境應休別臥鄰

洞庭湖

空江浩蕩景蕭然盡日菰蒲泊釣船
青草浪高三月渡

綠楊花撲一溪烟情多莫舉傷春目愁極兼無買酒錢
猶有漁人數家住不成村落夕陽邊

過分水嶺

隴山高共鳥行齊瞰險盤空甚躡梯雲勢崩騰時向背
水聲鳴咽若東西風兼雨氣吹人面石帶冰稜礙馬蹄
此去秦川無別路斷崖窮谷却難迷

曹鄴

鄴字鄴之桂州人陽朔志邑之崇賢里人鄭谷贈

鄴詩陽朔花盈棹宗賢葉滿溝莫休符風土記鄴
貴後徙居桂城觀察使令狐綯名其里為遷鶯嘗
為四愁三怨五情詩為中書舍人韋慤所知力薦
主司大中時登進士第由天平幕府遷太常博士
懿宗朝議宰相白敏中高璩諡持正不阿後歷祠
部郎中終洋州刺史為詩效魏晉近體較少

徐獻忠曰鄴之詩得於樂府古辭使人忘其鄙近

古體詩

東武吟

心如山上虎身若倉中鼠惆悵倚市門無人與之語夜
宴李將軍欲望心相許何曾聽我言貪譴邯鄲女獨上
黃金臺淒涼淚如雨

長相思

剪妾身上巾贈郎傷妾神郎車不暫停妾貌寧長春青
天無停雲滄海無停津遣妾空牀夢夜夜隨車輪

薄命妾

薄命長惻惻出門見南北劉郎馬蹄疾何處去不得淚
珠不可收蟲絲不可織知君綠桑下更有新相識

代羅敷詣使君

常言愛高山別妾向東京朝來見人說却知在石城未
必菖蒲花只向石城生自是使君眼見物皆有情麋鹿
同上山蓮藕同在泥莫學天上日朝東暮還西

和潘安仁金谷集

太守龍為馬將軍金作車香飄十里風風下綠珠歌莫

怪坐上客歎君庭前花明朝此池館不是石崇家

吳宮宴

吳宮城闕高龍鳳遙相倚四面鏗鼓鐘中央列羅綺春
風時一來蘭麝聞數里三度明月落青娥醉不起江頭
鐵劍鳴玉座成荒壘適來歌舞處未知身是鬼

姑蘇臺

南宮酒未銷又晏姑蘇臺美人和淚去半夜閭門開相
對正歌舞笑中聞鼓鼙星散九重門血流十二街一去

成萬古臺空人不回時聞野田中拾得黃金釵

趙城懷古

邯鄲舊公子騎馬又鳴珂手揮白玉鞭不避五侯車間
愁春日短沽酒入倡家一笑千萬金醉中贈秦蛾如今
高原上樹樹白楊花

讀李斯傳

一車致三轂本圖行地速不知駕馭難攀足成顛覆欺
暗尚不然欺明當自戮難將一人手掩得天下目不見

三尺墳雲陽草空綠

四望樓

樓在洛陽東今廢秦時有貴公子賈虛每自宴其上

背山見樓影應合與山齊座上日已出城中未鳴雞無限燕趙女吹笙上金梯風起洛陽東香過洛陽西公子長夜醉不聞子規啼

續幽憤

繁霜作陰起朱火乘夕發清晝冷無光蘭膏坐銷歇惟公執天憲身是臺中傑一逐楚太夫何人為君雪忽忽

鬼方路不許辭雙闕過門似他鄉舉趾如遺轍八月黃
草生洪濤入雲熱危魂沒太行客弔空骨節千年瘴江
水恨聲流不絕

古詞

高閣礙飛鳥人言是君家經年不歸去愛妾面上花妾
面雖有花妾心非女羅郎妻自不重於妾欲如何

霽後作

齊梁體

新霽辨草木晚塘明衣衿乳燕不歸宿雙雙飛向林微

照露花影輕雲浮來陰無人可招隱盡日登山吟

夜坐有懷

悄悄月出樹東南若微霜愁人不成寐五月夜亦長佳
期杳天末骨肉不在旁年華且有恨厥體難久康人言
力耕者歲旱亦有糧吾道固如此安得苦佺佺

送友人入塞

亂蓬無根日送子入青塞蒼茫萬里秋如見原野大鳥
雀寒不下山川迴相對一馬沒黃雲登高望猶在鷲風

忽然起白日黯已晦如何怨路長出門天之外

送厲圖南下第歸澧州

當春人盡歸我獨無歸計送君自多感不是緣下第君
看山上草盡有千雲勢結根既不然何必更掩袂澧水
鱸魚賤荆門楊柳細勿為陽艷留此處有月桂言畢尊
未乾十二門欲閉佇立望不見登高更留涕吟君別我
詩悵望水烟際

送進士李殷下第遊汾河

上國花照地遣君向西征旁人亦有恨況復故人情單
車欲行去別酒忽然醒如何今夜夢半作道路程邊士
不好禮全家住軍城城中鼓角嚴旅客常夜驚中有左
記室逢人眼光明西門未歸者下馬如到京還應一開
卷為子心不平慙慙說中抱壯志勿自輕

杏園席上同年

歧路不在天十年行不至一旦公道開青雲在平地枕
上數聲鼓衡門已如市白日探得珠不待驪龍睡忽忽

出九衢童僕顏色異故衣未及換尚有去年淚晴陽照
花影落絮浮野翠對酒時忽驚猶疑夢中事自憐孤飛
鳥時接鸞鳳翅永懷共濟心莫起胡越意

翠孤至渚宮寄座主相公

萬里一孤舟春行夏方到骨肉盡單羸沈憂滿懷抱羈
孤相對泣性命不相保開戶山鼠驚蟲聲亂秋草白菌
緣屋生黃蒿擁籬倒對此起長嗟芳年亦須老恩門為
宰相出入用天道忽于摧落間收得青松操全家到江

陵屋虛風浩浩中腸自相伐日夕如寇盜其下有孤姪
其上有孀嫂黃糧賤于土一飯常不飽天斜日光薄地
濕蟲叫噪唯恐道忽消形容益枯槁古人於黃雀豈望
白環報奉答恩地恩何慙以誠告

從天平節度使遊平流園

池塘靜於寺俗事不到眼下馬如在山令人忽疎散明
公有高思到此遂長返乘興挈一壺折荷以為盞入竹
藤似蛇侵牆水成蘚幽鳥不識人時來拂冠冕沿流路

若窮及行路猶遠洞中已云夕洞口天未晚自憐不羈
者寫物性常簡翻愁此興多引得嵇康嬾

奉命齊州推事畢寄本府尚書

越鳥棲不定孤飛入齊鄉日暮天欲雨那無羽翎傷州
民言刺史蠹物甚於蝗受命大執法草草是行裝僕隸
皆分散單車驛路長四顧無相識奔馳若投荒重門下
長鎖樹影空過牆驅囚達廊屋穢穢如牛羊獄吏相對
語簿書堆滿牀敲枷打鎖聲終日在目旁既捨三山侶

來餘五斗糧忍學空城雀潛身入官倉國中天子令頭
上白日光曲木用處多不如直為梁恐孤食恩地晝夜
心不遑仲夏天氣熱鬚鬚忽成霜社鼠不可灌城狐不
易防偶於擒縱間盡得見否臧截斷姦吏舌劈開冤人
腸明朝向西望走馬歸汶陽

近體詩

長城下

遠水猶歸壑征人合憶鄉泣多盈袖血吟苦滿頭霜楚

國連天浪衡門到海荒何當生燕羽時得近雕梁

故人寄茶

劍外九華英絨題下玉京開時微月上碾處亂泉聲半
夜招僧至孤吟對月烹碧沈霞脚碎香泛乳花輕六腑
睡神去數朝詩思清用餘不敢費留伴肘書行

碧潯宴上有懷知己

荻花蘆葉滿溪流一簇笙歌在水樓金管曲長人盡醉
玉簪恩重獨生愁女蘿力弱難逢地桐樹心孤易感秋

莫怪當歡却惆悵全家欲上五湖舟

送進士下第歸南海

數片紅霞映夕陽攬君衣袂更移觴行人莫歎碧雲晚
上國每年春草芳雪過藍關寒氣薄雁回湘浦死聲長
應無惆悵滄波遠十二重樓非我鄉

旅次岳陽寄京中親故

君山南面浪連天一客愁心兩處懸身逐片帆歸楚澤
魂隨流水向秦川月回浦北千尋雪樹出湖東幾點烟

更欲登樓向西望北風催上洞庭船

金井怨

西風吹急景美人照金井不見面上花却恨井中影

思不見

但見出門蹤不見入門跡却笑山頭女無端化為石

築城

郎有薜蘿心妾有芙蓉質不辭嫁與郎築城無休日
嗚嗚啄人鴉軋軋上城車力盡土不盡得歸亦無家

築人非築城圍秦豈圍我不知城上土化作宮中火

樂府體

蓮子房房嫩菖蒲葉葉齊共結池中根不厭池中泥

四怨三愁五情詩

美人如新花許嫁還獨守豈無青銅鏡終日自疑醜
庭花已結子巖花纔弄色誰令生處遠用盡春風力
短髮一如螾長眉一如蛾相共棹蓮舟得花不如他
手推嘔啞車朝朝暮暮耕未曾分得穀空得老農名

遠夢如水急白髮如草新歸期待春至春至還送人
澗草短短青山月朗朗明此夜目不掩屋頭鳥啼聲
別家鬢未生到城鬢似髮朝朝臨川望灞水不入越
東西是長江南北是官道牛羊不戀山只戀山中草
阿嬌生漢宮西施住南國專房莫相妬各自有顏色
蛺蝶空中飛大桃庭中春見他夫婦好有女初嫁人
檳榔自無柯椰葉自無陰常羨庭前竹生筍高於林
野雀滿城饑交交復飛飛勿恡官倉粟官倉無空時

入關

衡門亦無路何況入西秦
救病不得穴徒為採艾人

自退

寒女面如花寂寂花對影
況我不嫁容甘為瓶墮并

徒相逢

江邊野花不須採
梁頭野燕不用親
西施本是越溪女
承恩不薦越溪人

老圃堂

一作薛能

飲定四庫全書

御定全唐詩錄

邵平瓜地接吾廬
穀雨乾時手自鋤
昨日春風欺不在
就床吹落讀殘書

題山居

掃葉煎茶摘葉書
心閒無夢夜窗虛
只應光武恩波晚
豈是嚴君戀釣魚

題女郎廟

數點香烟出廟門
女娥飛去影中存
年年嶺上春無主
露泣花愁斷客魂

寄劉駕

一川草色青裊裊
遶屋水聲如在家
悵望美人不攜手
牆東又發數枝花

聽劉尊師彈琴

曾於青海獨聞蟬
又向空庭夜聽泉
不似齋堂人靜處
秋聲長在七條絃

御定全唐詩錄卷八十三

欽定四庫全書

御定全唐詩錄卷八十四

李羣玉

羣玉字文山澧州人性曠逸赴舉一上而止惟以吟咏自適裴休薦察湖南厚延致之及為相以詩論薦授弘文館校書郎未幾乞假歸羣玉才健邁詩筆妍麗好吹笙常使家僮奏之又善急就章性喜養白鷺盧肇贈詩妙吹應諧鳳工書定得鵝嘗

題詩黃陵廟神告以二年之兆果如期歿洪井

羣玉進詩表云草澤臣羣臣言臣宗緒凋淪丘壑
賤品幽沈江介分托漁樵伏遇皇帝陛下運屬昇
平率土歡泰沐雨露膏育之化在薰風長養之間
願同率舞之誠遠逐越裳之貢頃以鼓腹勲華之
代怡情林阜之隈涵泳皇風殆忘仕進以致年踰
不惑痼恙暴侵但慮寒餓江湖之濱與枯魚涸鱗
為伍瞑目黃壤虛謝文明是以徒步負琴遠至輦

下謹捧所業歌行古體七言今體五言今體等合
三百首謹詣光順門昧死上進伏以卿雲在天草
木五色廣野之氣燭為祥煙熙熙含生盡躋壽域
白日亭午物無斜陰方今風后提衡庶尹咸秩言
語侍從之列皆嚴徐班馬之倫凡在墨客詩人詠
歌聲名文物不暇何敢諷刺興於筆端臣所貢前
件歌詩以居住沅湘宗師屈宋楓江蘭浦蕩思搖
情蕪纈之餘過於諷野天丈不到徒窺星漢之高

滄海攸歸豈阻潢汙之陋然而爨桐不爆俄成曲
突之烟埋劍無光永作幽泉之鐵已濮下調塵觸
天聽螻蟻之微伏待刑戮謹拜表陳獻以聞延英
口宣勅旨卿所進歌詩異常高雅朕已遍覽今有
少錦彩器物賜卿宜領取夏熱卿比平安好又制
詞李羣玉放懷丘壑吟咏性情孤雲無心浮磬有
韻吐妍詞於麗則動清律於風騷冥鴻不歸羽翰
自逸霧豹遠近文彩益奇信不試而逾精能久幽

而獨樂念其求志可以言詩用是執維俾之刊校
可守弘文館校書郎

古體詩

秋怨

瑟瑟涼海氣西來送愁容金風死綠蕙玉露生寒松所
思在溟碧無因一相逢登樓睇去翼目盡滄波重虛窗
度流螢斜月啼幽蛩疎紅落殘艷冷水凋芙蓉歲暮空
太息年華逐遺蹤凝情耿不寐攬涕起疎幃

湘中古愁

涼風西海來直渡洞庭水
脩脩木葉下白浪連天起
衡蘭委皓霜百草一時死
摧殘負志人感歎何窮已

昔我觀雲夢窮秋經汨羅
靈均竟不返怨氣成微波
奠桂開古祠朦朧入幽蘿
落日瀟湘上淒涼吟九歌

南雲望重華水死悲一女
天邊九點黛白骨迷處所
朦朧波上瑟清夜降北渚
萬古一雙魂飄飄在烟雨

我思何所在

我思何所在乃在陽臺側良宵相望時空此明月色歸
魂泊湘雲飄蕩去不得覺來理舟楫波浪春湖白煙光
皓楚秋瑤草不忍摘因書天末心繫此雙飛翼

傷思

八月白露濃芙蓉抱香死紅枯金粉墮
風團葉下疊穀參差起不見棹歌人空垂綠房子

感興

洞房三五夕金缸凝燄滅美人抱雲和斜倚紗窗月沈

吟想幽夢閨思深不說絃冷玉指寒含顰達明發
朔雁銜邊秋寒聲落燕代先驚愁人耳顏髮潛銷改凝
雲蔽洛浦夢寐勞光彩天邊無書來相思淚成海

感春

春情不可狀艷艷令人醉暮水綠楊愁深窗落花思吳
宮新暖日海燕雙飛至愁思逐煙光空濛滿天地

漢陽春晚

漢陽抱青山飛樓映湘渚白雲蔽黃鶴綠樹藏鸚鵡憑

高送春目流恨傷千古遐想禰衡才令人怨黃祖

湘西寺霽夜

雨過琉璃宮佳興浩清絕松風冷晴難竹路踏碎月月
波蕩如水氣爽星明滅皓夜千樹寒崢嶸萬巖雪後山
鶴唳斷前池荷香發境寂涼夜深神思空飛越

盧溪道中

曉發潺湲亭夜宿潺湲水風簟掃石瀨琴聲九十里光
奔覺來眼寒落夢中耳曾向三峽行巴江亦如此

雨夜呈長官

遠客坐長夜雨聲孤寺秋請量東海水看取淺深愁
窮重於山終年壓人頭朱顏與芳景暗赴東波流鱗翼
俟風水青雲方阻修孤燈冷素焰蟲響寒房幽借問陶
淵明何物可忘憂無因一酌酹高枕萬情休

江樓獨酌懷從叔

水國發爽氣川光靜高秋酣歌金樽醪送此青楓愁楚
色忽滿目灘聲落西樓雲翻天邊葉月弄波上釣芳意

長搖落蘅蘭謝汀洲長吟碧雲合悵望江之幽

小弟艤南遊近書來

湘南客帆稀遊子寡消息經時停尺素望盡雲邊翼笑
言憑夢寐獨立想容色落景無來人修江入天白停停
倚門念瑟瑟風雨夕何處泊扁舟迢遞湍波側秋歸舊
窗竹永夜一淒寂吟爾鵲鵲篇中宵慰相憶

將遊羅浮登廣陵楞伽臺別羽客

清遠登高臺晃朗縱遊歷濯泉喚仙風於此盪靈魄冷

光邀遠目百里見海色送雲歸蓬壺望鶴滅秋碧波瀾
收日氣天上回澄寂百越落掌中十洲點空白身居飛
鳥上口詠玄元籍飄如出塵籠想望吹簫客冥冥人間
世歌笑不足惜竭來羅浮顛披雲鍊瓊液謝公雲岑興
可以躡高跡吾將抱瑤琴絕境縱所適

別尹鍊師

吾家五千言至道懸日月若非函關令誰註流沙說多
君飛昇志機悟獨超拔學道玉笥山燒丹白雲穴南窮

衡疑秀採藥歷幽絕夜臥瀑布風朝行碧巖雪洞宮四
百日玉籍恣探閱徒以菌蟪姿緬攀修真訣塵籠罩浮
世遐志空飛越一罷碁酒歡離情滿寥泝願騎紫蓋鶴
早向黃金闕城市不可留塵埃穢仙骨

送鄭子寬棄官東遊便歸女兒

八月湖浸天揚帆入秋色岷峨雪氣來寒漲瀟湘碧子
真冥鴻志不逐籠下翼九女疊雲屏於焉恣棲息新詩
山水思靜入陶謝室因醉松花春追攀紫烟客相逢十

年舊嘖笑等歡感一飯玉露疏中腸展堆積停食不盡
意傾景悵可惜雲水一分飛離憂洞庭側迴車三鄉路
仙菊正堪摘寄謝杜蘭香何年別張碩

龍山人惠石廩方及團茶

客有衡岳隱遺予石廩茶自云凌烟露採掇春山芽珪
璧相壓疊積芳莫能加碾成黃金粉輕嫩如松花紅爐
爨霜枝越兒斟井華灘聲起魚眼滿鼎漂清霞凝澄坐
曉燈病眼如蒙紗一甌拂昏寐襟鬲開煩挐顧渚與方

山誰人留品差持甌默吟味搖膝空咨嗟

醒起獨酌懷友

西風靜夜吹蓮塘芙蓉破紅金粉香摘花把酒弄秋芳
吳雲楚水愁茫茫美人此夕不入夢獨宿高樓明月涼

近體詩

湖閣

楚色籠秋草秋光洗洞庭夕霏生水寺初月盡雲汀棹
響來空濶漁歌發杳冥欲浮欄下艇一到斗牛星

登蒲澗寺後二巖

五仙騎五羊何代降茲鄉澗有堯年韭山餘禹日糧樓

臺籠海色草樹發天香浩笑波光裏浮溟興甚長

典術曰堯

時天降精於庭遺韭感百陰為菖蒲南越志云菖蒲為安期生所種

南溟吞越絕極望碧鴻濛龍度潮聲裏雷喧雨氣中趙
佗丘壠滅馬援鼓聲空遐想魚鵬化開襟九萬風

遊玉芝觀

尋仙向玉清獨倚雪初晴木落寒郊迴烟開疊嶂明片

雲盤鶴影孤
磬雜松聲且
共探玄理歸
途月未生

雲安

灘惡黃牛吼
城孤白帝秋
水寒巴字急
歌迴竹枝愁
樹倚荆王館
雲昏蜀客舟
瑤姬不可見
行雨在高丘

湖閣曉晴寄呈從翁

高秋憑遠檻
萬里看新晴
重霧披天急
閒雲觸石輕
湖山四五點
湘鴈兩三聲
遙想潘園裏
琴尊興轉清

臨水薔薇

堪愛復堪傷無情不久長浪搖千臉笑風舞一叢芳似
濯文君錦如啼漢女妝所思雲雨外何處寄馨香

晚蓮

露冷芳意盡稀疎空碧荷殘香隨暮雨枯莖墮寒波楚
客罷奇服吳姬停擢歌涉江無可寄幽恨竟如何

早鴻

木落波浪動南飛聞夜鴻參差天漢霧嘹唳月明風野
水蓮莖折寒泥稻穗空無令一行侶相失五湖中

金塘路中

山連楚越復吳秦蓬梗何年是住身黃葉黃花古城路
秋風秋雨別家人冰霜怯度商於凍桂玉愁居帝里貧
十口繫心拋不得每回回首即長顰

黃陵廟

小姑洲北浦雲邊二女明妝共儼然野廟向江春寂寂
古碑無字草芊芊迴風日暮吹芳芷落月山深哭杜鵑
猶似含顰望巡狩九疑凝黛隔湘川

玉真觀

高情帝女慕乘鸞紺髮初簪玉葉冠秋月無雲生碧落
素萼含露出清瀾層城烟霧將歸遠浮世塵埃久駐難
一自簫聲飛去後洞宮深掩碧瑤壇

同鄭相并歌姬小飲因以贈獻

裙拖六幅湘江水鬢聳巫山一段雲風格只應天上有
歌聲豈合世間聞曾前瑞雪燈斜照眼底桃花酒半醺
不是相如憐賦客肯教容易見文君

醉後贈馮姬

黃昏歌舞促瓊筵
銀燭臺西見小憐
二寸橫波回慢水
一雙纖手語香弦
桂形淺拂梁家黛
瓜字初分碧玉年
願托襄王雲雨夢
陽臺今夜降神仙

寄長沙許侍御

二年文會許追隨
和遍南朝雜體詩
未以綵毫還郭璞
乞留殘錦與丘遲
竹齋琴酒歡成夢
水寺烟霞賞對誰
今日秋風滿湘浦
只令搔首詠瓊枝

送蕭十二校書赴郢州婚姻

蓬萊才子即蕭郎，綵服青春卜鳳凰。
玉佩定催紅粉色，錦衾應惹翠雲香。
馬穿暮雨荆山遠，人宿寒燈郢夢長。
領取和鳴好風景，石城花月送歸鄉。

古樂府有鳳兮歸故鄉

九子坂聞鷓鴣

落照蒼茫秋草明，鷓鴣啼處遠人行。
正穿屈曲崎嶇路，又聽鉤輈格磔聲。
曾泊桂江深岸雨，亦於梅嶺阻歸程。
此時為爾腸千斷，乞放今宵白髮生。

南莊春晚

草暖沙長望去舟
微茫烟浪向巴丘
沅江寂寂春歸盡
水綠蘋香人自愁

北亭

斜雨飛絲織晚空
疎簾半捲野亭風
荷花向盡秋光晚
零落殘紅綠沼中

江南

鱗鱗別浦起微波
泛泛輕舟桃葉歌
斜雪北風何處宿

江南一路酒旗多

紫極宮齋後

紫府空歌碧落寒曉星寥亮月光殘一羣白鶴高飛散

惟有松風吹石壇

黃陵廟

黃陵廟前春已空子規啼血滴松風不知精爽落何處

疑似行雲秋水中

太平廣記羣玉解天祿之任歸涔陽經二妃廟題詩云云羣玉疑春空遂

至秋色欲易之恍若有物告以二年之兆時襄陽太守段成式志其事後二年果死于洪井段以詩哭之事與

詩見
段集

漢陽太白樓

江上晴樓翠靄間，滿簾春水滿窗山。
青楓綠草將愁去，遠入吳雲暝不還。

戲贈姬人賦尖字韻

一作張
祐詩

骰子巡拋裏手拈，無因得見玉纖纖。
但知謔道金釵落，圖向人前露指尖。

劉駕

駕字司南江東人工古風大中六年登進士第官
國子博士

紀事云駕與曹鄴友善鄴擢第不出京候駕登科
同去兩人俱以古詩名故相契如此

徐獻忠云司南矯時新體多作古詩雖乏筆致亦
頗渾雄

古體詩

築城詞

前杵與後杵築城聲不住我願築更高得見秦皇墓

戰城南

城南征戰多城北無飢鴉白骨馬蹄下誰言皆有家城
前水聲苦倏忽流萬古莫爭城外地城裏終閒土

空城雀

飢啄空城土莫近太倉粟一粒未充腸却入公子腹且
弔城下客豈曾空爾族不聞莊辛語今日寒蕪綠

苦寒吟

百泉凍皆咽我吟寒更切半夜倚喬松不覺滿衣雪竹
竿有甘苦我愛抱苦節鳥聲有悲歡我愛口流血潘生
若解吟更早生白髮

苦寒行

嚴寒動八荒荊荊無休時陽鳥不自暖雪壓扶桑枝歲
暮寒益壯青春安得歸朔雁到南海越禽何處飛誰言
貧士歎不為身無衣

賈客詞

賈客燈下起猶言發已遲高山有疾路暗行終不疑冠
盜伏其側猛獸來相追金玉四散去空囊委路歧揚州
有大宅白骨無地歸少婦當此日對鏡弄花枝

皎皎詞

皎皎復皎皎逢時即為好高秋亦有花不及當春草班
姬入後宮飛燕舞東風青娥中夜起長歎月明裏

唐樂府

并序

唐樂府自送征夫至獻賀觴歌河湟之事也下

土土貢臣駕生於唐二十八年獲見明天子以
德歸河湟地臣得與天下夫婦復為太平人獨
恨愚且賤蠕蠕泥土中不得從臣後拜舞稱於
上前情有所發莫能自抑作詩十章目曰唐樂
府雖不足貢聲宗廟形容盛德而願與耕稼陶
漁者歌田野江湖間亦足自快

送征夫

昔送征夫苦今送征夫樂寒衣縱攜去應向歸時著天

子待功成別造凌烟閣

輸者謳

輓粟上高山高山若平地力盡心不怨同我家私事去
者不遑寧歸者唱歌行相逢古城下立語天未明一身
遠出塞十口無稅征

吊西人

河湟父老地盡知歸明主將軍入空城城下吊黃土所
願邊人耕歲歲生禾黍

邊軍過

城前兵馬過城裏人高臥官家自供給畏我家產破健
兒食肥肉戰馬食新穀食飽物有餘所恨無兩腹草青
見軍過草白見軍回軍回人更多盡繫西戎來

望歸馬

東人望歸馬馬歸蓮峯下蓮峯與地平亦不更徵兵

祝河水

河水清瀾瀾照見遠樹枝征人不飲馬再拜祝馮夷從

今億萬歲不見河濁時

田西邊

刀劍作鋤犁耕田古城下高秋禾黍多無地放羊馬

崑山

昔時王為寶崑山過不得今時王為塵崑山入中國白
王尚如塵誰肯愛金銀

樂邊人

在鄉身亦勞在邊腹亦飽父兄若一處任向邊頭老

獻賀觴

莫但取河湟河湟非邊疆願今日入處亦似天中央
天子壽萬歲再拜獻此觴

牧童

牧童見客拜山果懷中落晝日驅牛歸前溪風雨惡

秦娥

秦娥十四五面白於指爪羞人夜采桑驚起戴勝鳥

鄰女

君嫌鄰女醜取婦他鄉縣料嫁與君人亦為鄰所賤
菖蒲花可貴只為人難見

桑婦

牆下桑葉盡春蠶半未老城南路迢迢今日起更早
四鄰無去伴醉臥青樓曉妾顏不如誰所貴守婦道一春
常在樹自覺身如鳥歸來見小姑新妝弄百草

棄婦

回車在門前欲上心更悲路傍見花發似妾初嫁時養

蠶已成繭織素猶在機新人應笑此何如畫蛾眉昨日
惜紅顏今日畏老遲良媒去不遠此恨今告誰

寄遠

雪花豈結子徒滿連理枝嫁與征人妻不得長相隨去
年君點行賤妾是新歸別早見未熟入夢無定姿悄悄
空閨中蛩聲遶羅帷得書喜猶甚况復見君時

姑蘇臺

句踐飲膽日吳酒香滿杯笙歌入海雲聲自姑蘇來西

施舞初罷侍兒整金釵衆女不敢妬自比泉下泥越鼓
聲騰騰吳天隔塵埃難將甬東地更學會稽樓霸跡一
朝盡草中棠梨開

釣臺懷古

澄流可濯纓嚴子但垂綸孤坐九層石遠笑清渭濱潛
龍飛上天四海豈無雲清氣不零雨安使澆埃塵我來
吟高風彷彿見斯人江月尚皎皎江石亦磷磷如何臺
下路明日又迷津

效古

融融芳景和杳杳春日斜
嬌嬈不自持清唱頻雙蛾
終曲翻成泣新人下香車
新人且莫喜故人曾如此
燕趙猶生女郎豈有終始

效陶

兩曜無停馭蓬壺應有墓
何況印山色只近市井路
大恢生死網飛走無逃處
白髮忽已新紅顏豈如故
我有杯中物可以消萬慮
醉袖日婆娑誰能記朝暮
如求神

仙藥堦下亦種黍但使長兀然始見天地祖

醒後

醉臥芳草間酒醒日落後壺觴半傾覆客去應已久不
記折花時何得花在手

春臺

臺上樹陰合臺前流水多青春不出門坐見野田花誰
能學公子走馬逐香車六街塵滿衣鼓絕方還家

上巳日

上巳曲江濱喧於市朝路相尋不見者此地皆相遇日
光去此遠翠幕張如霧何事歡娛中易覺春城暮物情
重此節不是愛芳樹明日花更多何人肯回顧

曲江春霽

宿雨洗秦樹舊花如新開池邊草未乾日照人馬來馬
蹄踏流水漸漸成塵埃鴛鴦不敢下飛繞岸東西此地
喧仍舊歸人亦滿街

早行

馬上續殘夢馬嘶時復驚心孤多所虞僮僕近我行棲
禽未分散落月照古城莫羨居者閒冢邊人已耕

秋夕

促織燈下吟燈光冷於水鄉魂坐中去倚壁身如死求
名為骨肉骨肉萬餘里富貴在何時離別今如此出門
長歎息月白西風起

馮叟居

天作馮叟居山僧尚嫌僻開門因兩樹結宇倚翠壁溪

南有微徑時遇採芝客往往白雲生對面千里隔機忘
若童僕常與猿鳥劇曬藥上小峰庭深無日色自從歸
鄉里不見新舊戚纍纍子孫墓秋風吹古柏

長安旅舍抒情投先達

岐路不在地馬蹄徒苦辛上國聞姓名不如山中大
宅滿六街此身入誰門愁心日散亂有似空中塵白露
下長安百蟲鳴草根方當秋賦日却憶歸山村靜女頭
欲白良媒况我鄰無令苦長歎長歎消人魂

琪樹下因喟六韻呈先達者

舉世愛嘉樹此樹何人識
清秋遠山意偶向亭際得
奇柯交若鬬生葉密如織
塵中尚菁葱更想塵外色
所宜巢三鳥影入瑤池碧
移根豈無時一問紫烟客

近體詩

春夜

一別杜陵歸未期
祇憑魂夢接親知
近來欲睡渾難睡
夜夜夜深聞子規

秋懷

歲歲干戈阻路岐
望山心切與心違
秋來何處開懷抱
日日斜空醉歸

望月

清秋新霽與君同
江上高樓倚碧空
酒盡露零賓客散
更更更漏月明中

晚登成都迎春閣

朱櫺凭闌眺錦城
煙籠萬井二江明
香風滿閣花滿樹

樹樹樹頭啼曉鶯

段成式

成式字柯古宰相文昌子以蔭為校書郎研精苦
學秘閣書籍披閱皆遍歷尚書郎太常少卿連典
九江縉雲廬陵三郡坐累退居襄陽以書史自娛
尤深佛書

玉堂閒話云成式少好馳獵文昌以為患令幕客
言之唯唯遂謝翊日復出獵諸客各送兔一雙書

中徵引典故無一事重疊者諸客齊詣文昌以書
示之始知其子藝文該贍

近體詩

折楊柳

枝枝交影鎖長門嫩色曾沾雨露恩鳳輦不來春欲盡
空留鶯語到黃昏

玉樓烟薄不勝芳金屋寒輕翠帶長公子驂騑往何處
綠陰堪繫紫遊韁

隋家堤上已成塵
漢將營邊不復春
只向江南并塞北
酒旗相伴惹行人

題谷隱蘭若

風惹閒雲半谷陰
巖西隱者醉相尋
草衰乍覺徑增險
葉盡却疑溪不深

風帶巢熊拗樹聲
老僧相引入雲行
半坡新路畬纔了
一谷寒烟燒不成

戲高侍御

七尺髮猶三角梳玳牛獨駕長檐車曾城自有三青鳥
不要蓮東雙鯉魚

花恨紅腰柳妬眉東鄰牆短不曾窺猶憐最小分瓜日
奈許迎春得藕時

自等腰身尺六疆兩重危鬚盡釵長欲薰羅薦嫌龍腦
須為尋求石葉香

別起青樓作幾層斜陽慢卷鹿盧繩厭裁魚子深紅纈
泥覓蜻蜓淺珀綾

可羨羅敷自有夫
愁中漫捋白髭鬚
豹錢驄子能擎舉
兼著連乾許換無

朝飛卿

醉袂幾侵魚子纈
飄纓長罥鳳凰釵
知君欲作閒情賦
應願將身作錦鞵

飛卿有
錦鞵賦



御定全唐詩錄卷八十四